

宋詩抄初集

瀟溪集

漫塘集

義豐集

東坡集

盧溪集鈔

王庭珪字民瞻廬陵人登政和八年第調衡州茶陵丞拂衣去盧溪築草堂因號焉時胡銓論忤秦檜謫嶺南獨庭珪送以詩語且觸檜坐流夜郎檜死得還數召對優禮除國子監主簿主管台州崇道院九十三卒學邃于易著易解見者歎爲必傳會詩獄捕至攜書鐫篋中爲卒所攫去歎曰天厄吾書門人楊廷秀序其詩謂得傳於曹子方出自少陵而主於雄剛渾大此第言其崖岸爾若遣息屬辭未離窠坎使真氣蒙翳於篇句間亦未免於詩家疵癘也

題宣和御畫

玉鎖宮扉三十六誰識連昌滿宮竹內苑寒梅欲放春龍

池水暖鴛鴦浴宣和殿後新雨晴兩鵲飛來向東鳴當時
妙手貌不成君王筆下春風生長安老人眼曾見萬歲山
頭翠華轉恨臣不及宣政初痛哭天涯觀畫圖

舟次白沙

朝發螺浦湄暮宿白沙口初爲夜行計有物應掣肘山雲
四面起風濤半江吼落帆危石磯就枕不敢久林深鳴鶴
鵲村遠聞雞狗夢覺如月明破蓬見牛斗起視天色清解
纜欲放溜浪頭聒天響掀簸入我牖蒲帆未及張篙師復
回首渡頭有古祠壁畫雜怪醜舟人相與言勸我酬神酒
出處本細事陰晴亦常有我固不問天豈問土木偶

張持操攜徐獻之侍郎書見訪兼出示著述中興論
諸雜文爲賦詩一篇以文軸還之他日亦錄寄獻

之也

君不能徒步上書獻天子又不能移書帝城結王公欲將
筆力扛九鼎紙上有說能平戎宣和治極久忘戰羯奴騎
馬嘶淮甸是時猶屯百萬師無人北向放一箭大臣搏手
知何爲草間公卿兒女啼至今謀國無上策讀君斷藁令
人悲君家人物照青汗曲江猶識胡雛亂他年論事要回
天應向荊州尋好漢

贈別黃超然

我生不識黃太史猶及諸老談遺事藍田生玉海生珠謂
君眉目無乃似誰作江西宗派詩如今傳法不傳衣句中
有眼出月脇密付嫡孫人未知宗風後必喧人口雲夢更
須吞八九他年拈此一瓣香獅子窟中獅子吼

送吳叔舉主簿往清江受納秋苗

田頭作穀催入場一半白著輸官倉廬江主簿喜懷檄放
船椎鼓開帆檣蕭灘老農公事畢夾道歡呼羅酒漿笑言
歸去喚妻子今年租米兩平量

劉晞陽貧甚爨烟不屬書讀而不輟作詩遺之以激
其志因叙其貧之所以然冀當塗有聞之者

荷鋤初讀書中原已鼎沸輟耕仰太息衣食尚卒歲喧呼
傳點丁田廬忽湮替產盡猶索租從何出租稅廼知天寶
後信如石壕吏君門九重深旗戟森兵衛朱轡背相望莫
有察凋弊賴子天資高追琢自成器時能從諸生扣門來
問字長篇爛溢目春葩吐奇麗飢雖不堪煮要自飽風味
迺翁昔好事賓客常滿位小兒聽客語炊甑忘箸筆豈慮

飯成糜爾來糜亦廢誰能饋升斗與子黔突喙

寅陂行

安成西有寅陂溉田萬二千畝廢久官失其籍大姓專之陂傍之田歲比不登邑丞趙君搜訪耆耄盡得古跡浚溪港起堤闕躬視阡陌灌注先後各有繩約不可亂是歲紹興十三年適大旱而寅陂溉萬二千畝苗獨不稿民頌歌之國家方下勸農之詔法有農田水利實丞職也然緣是而僞自增飾以蒙褒顯者世不爲怪由是水利爲虛名今寅陂功績崇崛丞不肖自言部使者終不及省察某出城別君東門外逢寅陂之民塞路涕泣言此爲叙其事作寅陂行不復緣飾皆老農語也冀有採之者紹興癸亥十月望日書

安成城頭烏夜宿啼烏未起雞登木傾村入城來送君馬
首摩肩袂相屬但有龐首不識名何物老翁出山谷老翁
持酒前致詞家住西村大江曲大江兩岸皆腴田古有寅
陂置官屬自從陂廢田亦荒官中無人開舊瀆公公故道
堰橫流陂傍秔稻年年熟今年雖旱翁不憂田頭已打新
春穀誰云此陂會當復老父曾聞兩黃鵠嗟哉如君不負
丞躬行阡陌勸農耕監司項背只相望風謠滿路胡不聽
胡不聽寅陂行爲扣天闥叫一聲

送宣向卿往衡山兼寄胡康侯侍講

朱陵衡岳仙人所居公是行緣

故文招隱公有雪竇錄歷詆諸監司

海內甲馬未盡休豪英爲時當出謀天生奇才必有用何
乃相率居岩幽胡公人品今第一汗漫久作朱陵遊朱陵

窟宅倚蒼翠此公招隱安可畱九廟今誰起頽壓四方正
爾煩誅求我聞昔時元刺史春陵地分天子憂少陵作詩
頌其事至今人傳元道州公爲道州績尤偉誰爲再作春
陵謳孤城疲卒捍狂賊高論力詆庸兒羞安得如公數十
輩叅錯天下爲邦侯京洛腥羶不難掃潢池寇孽不難收
願公早請尚方劒先斬佞臣張禹頭

贈齊軒仲素老

并序

齊軒仲素老自安成京師遊螺川凡十餘偶過其居齊
軒面東山一峰曰秀巖烟雲草木翠色依然真逸道人
作詩招之以代東山移文云

秀嶺明東城飛翠橫空斷煙霞互滅沒爽氣浮清旦旁連
仙人樓殿出天半金龍蟠繡柱銀榜開琳館齊軒面青

葱下瞰綠篠岸我嘗醉其上謳吟雜悲歎一時賢士夫車

馬共遊歟當年二學士

伍醇父劉偉明

落筆瀉銀漢曾賦齊軒詩

字字星斗爛事逐雲雨空鬼錄尚可按重來兵火餘觸目
自淒惋惟有軒前山秀色還舊觀曉猿驚未已歸袂何必
挽胡爲走塵埃廢此奇一段山靈亦可畏移文定嘲玩

送陸景莊提幹

驅車越荆吳轍跡走欲半是時親戚多烜赫踐華貫中有
衣繡人持斧下霄漢利權炙可熟冷語冰未泮徒乘朱班
輪呵殿嚇間閨如讎帶面具應遭鬼笑玩而况新失職誰
官聽呼喚坐令公困窮旅突幾不爨蔚然鸞鳳姿胡爲雜
鵝鸛我實憎此曹期君遊汗漫

次韻曾育才翠樾堂雪詩

哦君翠樾堂中雪詞如劒戟相磨切又如牛鐸應黃鍾水
中躍出蕤賓鐵因誦東坡憶雪詩城郭山川兩奇絕翠樾
堂中雪復然敢擬片詞增窠竊長安道上醉騎驢忍凍不
知蹄屢蹶爭似淮西破賊時蔡州城外沙如月將軍一箭
射欃槍夜落城頭曉方滅捷書飛奏不動塵露布馳來迷
玉關醉翁句律號令嚴凍口何由更開說銀杯任逐馬蹄
翻斷藁殘編且扃鐫

同陳思忠訪洪覺範

尋春反向僧房卧無乃行藏與時左起來刮目覽新詩花
壓欄干夢初破黃葉丹楓屬興深吁然莫測疑楚此惠休
島可沒已久二百年來無此作世間何處著斯人秀句天
教出寒餓我氣未衰詞頗弱欲借鼓旗聊一佐終朝巖下

不逢人苔色應嗔馬蹄泥

酬聶達夫惠所業

聶郎贈我長短句大盤小盤推玉筍當年持此驚市人破
帽蹇驢誰借譽厭聞百鳥呼春風自作綵鳳鳴孤桐俗聞
惡語敗人意胡不謁帝明光宮

次韻張子春賦瑤林春色

余瑤林洞中以醪醑作麴
因爲酒名

花間酌酒邀明月月照金樽佳興發鯨吞霧捲百川空醉
挽醪醑落香雪便將壘麴築糟丘醪醑壓膏麥爲麴釀成
忽見張公子公子家居近丹闕爲予乘興誇洛陽笑指沙
頭卧雙榼洛陽視此真草野敢欲新詩借牙頰瑤林名字
出風塵未遇知音那敢說况能大讀離騷句痛飲雖多不
爲餐未識王家碧玉香髯東坡真一訣誅茅本結方外

人豈用禮法相分別預拂瑤林一片石與君醉過清明節
窮亦不足悲達亦不足說酒闌挿劍怒肝膽正恐不免論
功業

和陳柄臣見贈

北人愁聽江南曲細草新蒲幾回綠當年避胡初渡南千
官蒼黃飯不足中原亂後又逢春邊頭只道無烟塵邇來
公卿不生事此事必屬非常人我曹生長江南樂豈料翻
成風土惡湖海元龍氣尚豪贈我新詩何璀璨錯拾遺後出
最能文脩椽大屋今荒墳遠孫高材淹管庫猶能落筆生
烟雲山城相遇初相喜共論大梁人物美莫學夷門抱關
吏謀竊兵符椎晉鄙

李仲孫佩軒

我友李仲孫飭身一何介被服古衣冠昂然偉而怪開軒
蓬戶中紉蘭以爲佩布袍挹公卿脫幘卧江海方其得意
時天地不能碍荷鋤入深林剪薙發幽菁清芬動窗壁蕙
若連光彩君看紫綬翁腰垂黃金帶璜玕錯琚瑀印章如
斗大步趨踏龍尾鏘然中音會豈如此香草擢秀繁霜外
秋風落萬木臭味久逾在我思軒中人免食三斗艾夢寐
欲見之一往清鼻界

送駱仲武

淵明不喜折腰趨寧作拄笏何易于勸農使者鄙丈夫少
年新進安識渠下馬怒頗虬奮鬚指揮星火飛文符詈辭
愧語靡不無諸公止欲求薦書椎斲肌骨尋膏腴公爲一
笑憐其愚熙朝成法字已孚堅如金石莫可無鞭且勿施

安用蒲三年竟亦無逃遁吏民遮道相歡呼生立叢祠傍
佛區想當逸氣吞江湖與人恢疏無怨吁臨邛小子傲鄉
閭方乘朱輪呵道衢公歸西山結茅廬丹崖絕壁巉空虛
誰能負弩當道隅終日與爾爲前驅

觀徐明叔畫湘西磨崖圖

崖在湘西白鶴峰紀官軍
破賊

衡山高出北斗邊九疑蒼梧相屬聯羣峰環走如却立山
脚插入瀟湘川朱陵渺邈迷處所白鶴噴薄飛流泉坐看
徐郎拂絹素盡驅山岳置眼前徐郎豈是真畫手酒酣遊
戲乃其天巴陵洞庭連浦溆鯨鯢蟠穴爲賊淵詔謂將軍
出旗鼓樓船蹴踏驚浪喧欃槍夜落照湖水雕弓十萬猶
控弦湘西古寺最奇絕丹崖翠壁開何年况公文章善叙
事大字怪偉宜鑱鐫中書異時觀落筆因煩吮墨圖凌煙

孟公韓公毛髮動腰鞞大羽冠進賢他年中興事可考公名亦與茲山傳

題惠崇畫秋江鳧雁

老崇學畫如學禪中年悟入理或然長江未落鳧雁下舒卷忽若無丹鉛定自維摩三昧裏半幅生絹開萬里不用并州快剪刀斷取鐵圍山下水

往年見趙德之說惠崇嘗自言我畫中年後有悟入

處豈非慧力中所得圓熟故耶今觀此短軸定非少年時筆也故詩中云爾

雅歌樓詩送永豐宰鄧晉卿

潢池赤子弄庫兵犬牙蟠接虔漳汀十年烽火照縣郭白晝不敢問衙庭忽見青樓臨大路樓上高歌揮白羽樓前解角看投壺終歲不聞檣戰鼓主人坐笑已風流小婦鳴箏樓上頭曲罷仍能雅歌舞送君此舞傳中州

贈寫真徐濤

并引

世言畫工喜作鬼魅謂荒誕易圖也故傳神寫照爲難
聞徐濤畫盧溪老子作幅巾芒鞋蕭散之狀見者以爲
甚似作詩求之

徐生畫人不畫鬼點目加毛必佳士邇來下筆更逼真勿
論山僧及童子會貌詩人孟浩然便覺灞橋風雪起如今
儻欲畫盧溪一菴宜著淡巖裏

戴國和得潘衡墨法於言意之外今攜之湖湘必有
識之者作詩以送之

老潘膠法秘不傳君獨得之乃其天此法髣髴如叅禪忽
然有省夜不眠又如神仙換骨法應手不自知其然湖東
大帥天下賢詞源如海筆如椽本是玉堂揮翰手正要此

物供磨研醉題李白三百首掃盡將軍九萬牋老潘歿來
知幾年聲名始落瀟湘川君不見呂洞賓竹絲籃子烏紗
巾長安市上無人識喚作湖西賣墨人

和酬黃子默

牛渚西江夜新聲月下聞定知終夕詠不覺曉光分儻有
罇中酒重論日暮雲山林正憔悴抵掌忽逢君

辰州上元

畱滯遠湘浦飄如雲水僧來爲萬里客又看一年燈翠幃
褰珠箔高樓俯玉繩鰲山今夜月應上最高層

入辰州界道中用頓子韻

路入荒溪惡波穿亂石跳騎驢行木杪避水轉山腰倒挂
猿當道橫過竹渡橋吾生本如寄歲晚尚飄飄